

# GROOT'N,

# OAL'N

# GRIEZ'N

1. *Groot'n oal'n griez'n,  
mill'n in 't drokke stad,  
as i-j konn' proat'n,  
zatt'n wi-j op 't gat  
roondum 'n hoog'n toor'n  
en loster'n aait maar weer,  
noar wat d'r gebuurd is  
in tied'n smos aleer.  
Hier bin i-j geboor'n,  
zun doezend jaar geleen  
oet wat roewe plaank'n  
en dikke knobb'ns steen.*
2. *Groot'n, oal'n griez'n  
gängs luk groter greujd  
aj mangs luk te klèèn wann'  
of d'r har braand 'egleujd.  
Wiedvot keek i-j 't vèèld in  
zagg'n leu oet Twekkel, Drien',  
de Esmaark, Lönn'ker, Ossel  
op owzölm anschriey'n.  
Meespats op de kloompe,  
mangs duur drekkig ven:  
't vròmme volk van vroower  
duur alle tied'n hen.*
3. *Groot'n, oal'n griez'n  
bi-j di-j oonder dak  
haal'n de leu 'ne bòsschop,  
as 't gewett'n stak.  
Doar kloonk'n oale weure  
vuur klèèn'n dee wann' geboor'n,  
doar hebt de leu ve'nomm'n:  
met 't Woord geet numms ve'loor'n.  
'n Heerroom en 'n doomneer  
prèèkt'n doar kwoad oet 't zin,  
Ze zèèd'n: noa bitt'ren armood,  
koomp 't Hemmelse gewin.*
4. *Groot'n, oal'n griez'n  
i-j kiekt gloep'ns veer,  
meer nóóit oet de heugte  
op de meënsche neer.  
Dàt deuj op soldoat'n  
oet Fraankriek en de Pruus,  
dee zik hier woll'n nössel'n  
bi-j 'n Twèènts fenuus.  
Ook keek i-j neer op 't Herr'nvolk  
dat met verlees in 't zich'  
de klokk'n oet dien lief haal'n.  
Duutse noaberplich'?*
5. *Groot'n, oal'n griez'n  
eeuw'n lang, van wied en zied  
gung 't volk bi-j di-j noar binn',  
i-j heb't an de tied!  
I-j zagg'n zovöl ve'dwien'n,  
ook hóge schòssteens komm'n en goan,  
köj oons in diene wiesheid  
wat vuur de toekomst roan' ?  
Meer ach- wi-j weet wa better,  
Wat kan e oons beloam'n ?  
'n Groot'n, oal'n griez'n  
wis nich vuur niks noar boam'n!*

Ossel, Meert 1992  
Hennik van 'n Scheenken